

萬 有 文 庫

第二集七百七種

王 雲 五 主 編

文山先生全集

(四)

文 天 祥 著

商務印書館發行



# 文山先生全集卷之十一

## 講義

### 西澗書院釋菜講義 知瑞州日

孟子曰。人之患在好爲人師。韓子犯之。而世恠且罵。柳子厚所謂惴惴然而不敢也。某承乏此邦。其於教化。號爲有一日之責。蓋嘗告朔而履乎學宮。得聞諸君之所以授受者。而親陟臯比。與逢掖講師弟子禮。則僭之爲尤。書堂有事乎先賢。諸君不鄙。而固以請。則雖寡陋。夫焉得辭。某初被命來守。嘗啓政路曰。古之爲諸侯。先政化而後簿書期會。世之不淑。乃倒置此。則相與病夫風俗之弊。而士行不立。且傷夫教道之久廢。而未有一救之也。固嘗有及於君子德業之義。而重反覆焉。輒誦所聞。并釋其旨。與諸君茂明之。

易曰。君子進德脩業。忠信所以進德也。脩辭立其誠。所以居業也。中心之謂忠。以實之謂信。無妄之謂誠。三者一道也。夫所謂德者。忠信而已矣。辭者。德之表。則立此忠信者。脩辭而已矣。德是就心上說。業是就事上說。德者統言。一善固德也。自其一善。以至於無一之不善。亦德也。德有等級。故曰進。忠信者。實心之謂。一念之實。固忠信也。自一念之實。以至於無一念之不實。亦忠信也。忠信之心。愈持養則愈充實。故曰。

忠信所以進德。脩辭者謹飭其辭也。辭之不可以妄發。則謹飭之。故脩辭所以立其誠。誠卽上面忠信字。居有守之意。蓋一辭之誠。固是忠信。以一辭之妄間之。則吾之業頓墮。而德亦隨之矣。故自其一辭之脩。以至於無一辭之不脩。則守之如一。而無所作輟。乃居業之義。德業如形影。德是存諸中者。業是德之著於外者。上言進。下言脩。業之脩。所以爲德之表也。上言脩業。下言脩辭。辭之脩。卽業之脩也。以進德對脩業。則修是用力。進是自然之進。以進德對居業。則進是未見其止。居是守之不變。惟其守之不變。所以未見其止也。辭之義有二。發於言則爲言辭。發於文則爲文辭。子以四教。文行忠信。雖若歧爲四者。然文行安有離乎忠信。有忠信之行。自然有忠信之文。能爲忠信之文。方是不失忠信之行。子曰。言忠信。行篤敬。則忠信進德之謂也。言忠信。則脩辭立誠之謂也。未有行篤敬。而言不忠信者。亦未有言不忠信。而可以語行之篤敬者也。天地間只一箇誠字。更擷撲不碎。觀德者。只觀人之辭。一句誠實。便是一德。句句誠實。便是德進而不可禦。人之於其辭也。其可不謹其口之所自出。而苟爲之哉。嗟乎。聖學浸遠。人僞交作。而言之無稽甚矣。誕謾而無當。謂之大言。悠揚而不根。謂之浮言。浸潤而膚受。謂之游言。遁天而倍情。謂之放言。此數種人。其言不本於其心。而害於忠信。不足論也。最是號爲能言者。卒與之語。出入乎性命道德之奧。宜若忠信人也。夷考其私。則固有行如狗彘而不掩焉者。而其於文也亦然。滔滔然寫出來。無非貫串孔孟。引接伊洛。辭嚴義正。使人讀之。肅容歛衽之不暇。然而外頭如此。中心不如此。其實則是脫空。

誑謾先儒謂這樣無緣做得好人。爲其無爲善之地也。外面一幅當雖好。裏面卻踏空。永不足以爲善。蓋由彼以聖賢法語。止可借爲議論之助。而使之實體之於其身。則曰此迂闊也。而何以便吾私。是以心口相反。所言與所行如出二人。嗚呼。聖賢千言萬語。教人存心養性。所以存養此真實也。豈以資人之口體而已哉。俗學至此。遂使實實之道衰。浮僞之意勝。而風俗之不競從之。其陷於惡而不知反者。旣以妄終其身。而方來之秀。習於其父兄之教。良心善性。亦漸漬汨沒。而墮於不忠不信之歸。昔人有言。今天下溺矣。吾黨之士。猶幸而不盡溺於波瀾。倒之衝。纓冠束帶。相與於此。求夫救溺之策。則如之何。噫。宜亦知所勉矣。或曰。至誠無息。不息則久。積之自然如此。豈卒然旦暮所及哉。今有人焉。平生無以議爲。而一日警省。欲於誠學旋生用工夫。則前妄猶可贖乎。曰。無傷也。溫公五六歲時。一婢子以湯脫胡桃皮。公給其女兄曰。自脫也。公父阿之曰。小子何得謾語。公自是不敢謾語。然則溫公腳踏實地。做成九分人。蓋自五六歲時。一覺基之。溫公猶未免一語之疵也。元城事溫公凡五年。得一語曰誠。請問其目。曰。自不妄語入元城。自謂予初甚易之。及退而自攷括日之所行。與凡所言。自相掣肘矛盾者多矣。力行七年而後成。然則元城造成一箇言行一致。表裏相應。蓋自五年從遊之久。七年持養之熟。前乎此。元城猶未免乎掣肘矛盾之媿也。人患不知方耳。有能一日渙然而悟。盡改心志。求爲不謾不妄。日積月累。守之而不懈。則凡所爲人僞者。出而無所施於外。入而無所藏於中。自將銷磨泯沒。不得以爲吾之病。而縱橫妙用。莫非此。

誠。乾之君子在是矣。或曰。誠者。道之極致。而子直以忠信訓之。反以爲入道之始。其語誠若未安。曰。誠之爲言。各有所指。先儒論之詳矣。如周子所謂誠者。聖人之本。卽中庸所謂誠者。天之道。蓋指實理而言也。如所謂聖誠而已矣。卽中庸所謂天下至誠。指人之實有此理而言也。溫公元城之所謂誠。其意主於不欺詐。無矯僞。正學者立心之初。所當從事。非指誠之至者言之也。然學者。其自溫公元城之所謂誠。則由乾之君子。以至於中庸之聖人。若大路然。夫何遠之有。不敏何足以語誠。抑不自省察。則不覺而陷於人僞之惡。是安得不與同志極論其所終。以求自拔於流俗哉。愚也。請事斯語。諸君其服之無斁。

熙明殿進講敬天圖周易賁卦

彖曰。賁亨。柔來而文剛。故亨。分剛上而文柔。故小利有攸往。天文也。文明以正。人文也。觀乎天文。以察時變。觀乎人文。以化成天下。

臣聞賁。文飭也。色相間則成文。故柔來文剛。剛上文柔。剛柔相間。所以爲賁。賁離下艮上。離之體。中以一柔間兩剛。是柔來文剛。艮之體。上以一剛乘兩柔。是剛上文柔。使獨剛獨柔不相爲用。則不成文矣。此言賁之卦義也。天之文。爲二曜五行。象緯交錯。故曰觀乎天文。此言天之賁也。人之文。爲三綱五常。倫理次序。故曰觀乎人文。此言人之賁也。以上像易象大意。臣竊窺先皇帝作圖之旨。以敬天爲名。其於賁卦。實摘取觀乎天文。以察時變一條。臣謹按圖義而爲之辭。臣竊惟天一積氣耳。凡日月星辰。風

雨霜露皆氣之流行而發見者。流行發見處有光彩。便謂之文。然有順有逆。有休有咎。其爲證不一。莫不以人事爲主。時世也。彖易聖人。不曰天變。而曰時變。蓋常變雖麗於天。而所以常變。則係於時。人君一身。所以造化時世者也。故天文順其常。則可以知吾之無失政。一有變焉。咎卽在我。是故天文者。人君之一鏡也。觀鏡可以察妍媸。觀天文可以察善否。且如曆家算日食云。某日當食幾分。固是定數。然君德足以消弭變異。則是日陰雲不見。天雖有變。而實制於其時。又如旱魃災也。才側身脩行。則爲之銷去。熒惑妖也。才出一善言。則爲之退舍。天道人事。實不相遠。自古人君。凡知畏天者。其國未有不昌。先皇帝深識此理。故凡六經之言天文者。類聚而爲之圖。以便觀覽。且恐懼脩省焉。聖明知敬嚴父之圖。卽敬天在此矣。嗚呼。曷其奈何不敬。

此先生兼崇政殿說書日講篇也。講篇非一。如講詩之定之方中一篇。諷當時脩繕事。今亡其辭云。道體堂謹書。

### 行實

#### 先君子革齋先生事實

先君子諱儀。字士表。生嘉定乙亥八月二十四日。寶祐丙辰五月二十八日。歿于京。次年九月九日。封于鄉之佛原。嗚呼。天乎。仁者壽。有德者祿。先君子乃止是邪。不肖孤。上累先君子久于旅。飲膳醫藥失節。用

速禍。非天實不德。有惡子至此。疊戾丘淵。身百莫贖。柴骨鑠心。不自意偷視息。至今日。得貶勉圖大事。猶瀝血苦塊。以字先德。嗚呼。尙忍言之。先君子嘗考次譜系。文氏繇成都徙吉。五世祖炳然。居永和鎮。高祖正中。繇永和徙富川。曾祖利民。妣郭氏。祖安世。妣劉氏。考時用。妣鄒氏。繼母劉氏。世有吉德。鄉以君子長者稱。一是方寸留耕。于子子孫孫。先君子嘗言。滯學守固。化學來新。以一革字志韋佩。人皆稱革齋。性愛竹。依竹闢一室。傍竹居。或稱竹居。不肖孤聞之。諸父先君子幼穎慧。器質端重。進止如有尺寸。書經目輒曉大義。越時舉全文。不一遺。見鄉曲前輩。必肅容請益。暨長。天才逸發。志聞道。嗜書如飴。終日忘飲殮。夜擎燈密室。至丙丁或達旦。黎明挾冊簷立。認蠅字。不敢抗聲。愕寐者。人雖苦之。甘焉。蓄書山如經史子集。皆手自標序。無一紊。朱黃勘點。纖屑促密。靡不到。至天文地理醫卜等書。游驚殆徧。手錄積帙。以百。揮汗呵凍。弗斂。鈎引貫穿。舉大包小。各有條間。質難疑。剖析響應。某事出某書某卷。且指數以對。爲文發持滿。無不的中。機軸必已出。命意時。娓娓談他事。若莽於尋繹。一援筆。雲行水流。無凝滯。中年文氣益老。拾汗漫歸諸約。不峭峭刺目。有溫醇渾厚之風焉。閒居侃侃。春意溢出顏面。蚤事祖。盡敬祖母。優游暮齒。視藥膳。臥興扶持。華髮鍾愛。父嚴母慈。侍夙夜。省煖寒。一出忱意。不視顏色。爲肅愉。事繼母篤至。始終無纖芥間。一家氣象。藹如和風。鄉黨稱孝。於宗族厚。待季父。削藩町。悲忻同情。季父歿。不幸子病廢。經紀其家。撫幼姪等。己子。疏從遺孤振翼之。俾蒙于成。闢居居無居者。歲時衣粒。各有節度。嘗謂宗族一本。誼不得不

恤愛范文正公義田記規模次第曰吾得志當放此行之親嫗孤貧者哀矜勞苦撫字無遺力喪不克理辦之棺至己所服用捐以斂雖在疏末次序情文各惟其稱與人交好大體不爲細家迫速戶外屢日滿絕甘分少無疏密皆被和氣交誼天至聞貧困患難赴急如不及忱意感人有臨終握手歔歔流涕託之以孤者歲大比凡與大夫待博士選者皆有約首誼綿數科間不能與自捐貲籍其名暨充賦就奉爲助約所不及以意告傾己有爲行資至貸以應誼聲錚然對人氣語和易鄙夫簞人亦曲加體接無一失聲氣去里有蹈非彝悉忠愛援誼開陳聞者感動見後進片善獎予不容口孜孜誘掖如子弟給餼數畝畊者多不輸寧令負己不忍直于有司蒔園漁池相傲無一償亦不較間嗤不武則曰彼貧且殆吾奈何攬之有竊負其貲去旣而困還不惟不加責恤其人終身將作室桑木齊垣時癘死多露骸惻然曰吾可無居人不可無斂匠棺惠貧者歲賑饑隨所有不給至市粟以應顛連無告過目輒怵惕隨力爲謀一日讀書至晏子敝車羸馬事愀然曰使吾族吾親吾鄉人休休有餘至願也惜嗟再三家居門蔭茂木暇日相羊芳陰間雅嗜茶煎淪多手出時邀朋遊文字語移日樂極浩歌縱奕視世間融融云云漠不介胸次性凱樂惟恐拂人事經然諾雖不利於己不悔一言話傾盡肺腑無留藏應酬一切任真事不可直濟或道以詭御寧事不濟不爲恥已勝語及不平辭和氣舒無忤色有以欺心至知其私不發且無章於人欺者多愧悔感泣人皆嘆爲有德君子謂當於古人中求之誅者曰我公之德言矩行規世智黃間我心坦夷

市利血刃。我範驅馳。生平所爲事。皆可質鬼神而無疑。嗚呼。是得其槩矣。始天祥兄弟幼且長。先君子不疾其不令。昭蘇蒙滯納之義。方日授書。痛策硃。夜呼近燈。誦日課。誦竟。旁摘曲詰。使不早恬。以習于弗懈。小失眠。卽示顏色。雖盛寒暑。不縱檢束。天祥兄弟慄慄擎槃水。無敢色于儉。自此名師端友。招聘仍年。至時。先疇給費。久之室罄。力弗逮。迺率天祥兄弟。藏脩于竹居陳所。裒織軸。俾挾精剔華。鈎索遐奧。董綱要。竟日夕弗倦。雖貧。浩然自怡。有未見書。輒質衣以市。得書。注意鑽硃。又以授天祥。俾轉教諸弟。繇是程督益峻。書警語徧窗壁。如三尺在目。見爲文章。撥斲正氣。輒不懌。必維以法度。天祥兄弟奉嚴訓。蚤暮侍膝下。唯諾怡愉。不超師友。或書聲吾伊。或歛襟各靜坐。潛諷。或掩卷相與感嗟。人情世道。此時氣象。父母俱存。兄弟無故。天下之樂。莫加焉。歲乙卯。天祥璧俱叨與計偕。時仲弟靈孫年十有六。未試。墨于窗曰。出師未捷身先死。長使英雄淚滿襟。竟以疾先撒棘。一月卒。先君子及是。擘涕竚眙。悵悵痛悼。天祥璧將進禮部。欲董于征。顧先君子哭子方新。天祥璧復去左右。恐益重哀。出可寬襟抱。且旦夕定省。得不缺。不敢辭以臆。月望行。次年。天祥璧俱僥倖奏名。夏五戊戌。廷對。踰挾先君子病暑。投涼劑立甦。方徙一靜室。規便攝理。甲寅。集英賜第。天祥以不肖冒首唱。歸拜寓館。移時之期。集所。越一日。聞疾復侵。告于朝。不俟命。亟去侍藥。省劄下玉音。給假三日。時先君子雖病。神色不改。視脈者聚伺變候。僉曰。無虞。戊午。向申。忽病革。進藥卻弗服。曰。度吾不能起此疾。汝兄弟勉之。天祥璧震怖號慟。請命于天。祈促齡壽。親算不獲命。椎心

禱呼冀殞滅以代。又不獲命。入夜寂然而逝。嗚呼痛哉。嗚呼痛哉。厥明。畿漕聞于朝。朝命官吏來治喪事。六月庚申朔。天祥壁奉柩出國門。哀歸鄉士庶人。無不失聲痛嗟。路祭巷哭。以返于先廬。時七月癸丑也。嗚呼。先君子一至此邪。不肖孤二十有一載。弟方冠且髻。承顏菽水。歲月幾何。天乎不使終養。而蹙之于中身邪。慘焉逆旅。涕親舍。越在二千里外。天乎不使終于正寢。而忍至於客歛邪。往時征衣拜堂上。舉觴飲餞。親賓祖道外。期嚮何許。天乎遂以是爲永訣邪。天祥壁奉貢剡時。先君子已哀仲弟不見。孰謂方階祿釜。先君子纔見而禍遽作。天乎。天祥壁何以竊第爲邪。嗚呼。不肖孤事先君子不孝。奉起居無狀。有疾病而闔不知。不能積忱衷臆。倉卒無以動天聽。罪生不贖。背血被面。摧決肝胸。顛頓躑躅。裁以必死。顧屬續一語。忍痛受命。不敢不勉。恐無以祇訓于前人。以忝盛德。迺相宅兆。筮曰吉。排土濡涕。墳以竣役。將奉體魄安焉。嗚呼。渺音容。隔幽陰。終天而止矣。先君子妃曾氏。今男三人。天祥壁璋。女三人。懿孫淑。孫順。孫遺。墨有寶藏三十卷。隨意錄二十卷。痛惟先君子。利澤不施于人。名聲不昭于時。匪石遺德。恐久遂沈湮。天祥不揆不孝。哀錄事實。沈痛刺骨。荒忽恫怛。世有大手筆。能表章幽潛。光昭于無窮。稽首百拜以請。

### 知潮州寺丞東巖先生洪公行狀

東巖先生洪公。蓋陽巖先生文毅公族諸弟也。文毅公以孤忠遺直。著聞當世。其平生言論風旨。講切上下。公未嘗不在其間。文毅公屢召不赴。公浸嚮用。輒落落不合去。時論稱爲二洪。文毅公旣沒。泉南文獻

之望盡屬公。識者謂文毅公未爲者。將有爲也。而公又不及大用以死。天之生才。倏忽代謝。安得不深慨於此。敍次行事。諗諸方來。門人之責。奚以辭。公諱天驥。字逸仲。自號東巖。世晉江縣人。嘉定戊辰七月庚戌。公以生生有異質。沈靜專一。自少講求微言。通念曉析。乃已。故於經史諸子百家之辭。無不貫串。文章自成一家。以紹定改元薦于鄉。名聲振一時。學子踏門。願求模楷者日衆。公坦明夷粹。專以宿於道爲教。逮事王太母。一夕疾甚殆。公不解帶。不交睫。至剔股肉雜湯藥進。公一念之切。通于神明。然終身不以語人。登淳祐七年進士第。初筮邵武軍建寧縣尉。發擿姦伏。當官無所回撓。時有劫寇王若曾。嘯聚千餘人。騷動兩路。諸所委捕。多畏沮。公奮不顧身。提兵擣其巢。一舉空之。僞造成風。爲楮幣蠹。公密設方略。動中肯綮。李若鼎凡三大黨。與無不各就縛。薤獮之。石壁胡公穎。秋崖方公岳。交章以公善狀聞于朝。十二年。循從政郎。調連州推官。未上。寶祐改元。旨差監惠民南局。四年。較藝南宮。公考鏡詳密。精力不間晝夕。所賞拔士多根柢理致。當時號明有司。公雖浸近周行。然無所附麗。恂恂侃侃。望之山立。徐公清叟。吳公燧。馬公光祖。顏公頤仲。俱刻上其能。將用矣。會有言者。徒步西歸。泊如也。六年。淮閩擇士。自從。首辟致公爲屬。景定二年。通班授宣教郎。知廣州香山縣。至之日。以教養人才爲第一義。脩復大成殿。明倫有堂。主敬美身。賓賢登俊。有齋。皆捐俸入爲之。歛不及民。其爲政一裁於義。俗譁健戢。其尤桀黠者曰。此囚牙訟師。去則吾民安矣。邑以大治。洪公勳。趙公汝。暨雷公宜中。及倉憲。交以邑最上。咸淳元年。轉奉議郎。二年。差

監行在樞貨務都都茶場。四年，吳公革。馮公夢得、趙公順孫、劉公黻，皆以吏才爲薦。差監都進奏院，轉朝奉郎。馮公時爲刑侍，及戶侍。劉公應龍，交委以書，擬本部文字。公皆樂爲知己，盡于時上卽位逾年。初政新美，公輪當陞對，宿齋豫戒，冀積忱意，悟上心，取虞廷君臣時幾之說寓規焉。其一曰：君心勤怠之幾。二曰：人心離合之幾。三曰：君子小人消長之幾。四曰：中國外夷強弱之幾。及朱文公天理人欲之辨，首尾二千餘言，其辭諄複懇切，深刺膾髓。玉音嘆美。又言：泉有屯戍，左翼一軍，乏興之害。米舟搜糴，生變之虞。而朝廷籍沒翁林二氏之田，可歲得穀萬斛，以紓戍卒。兩月廩食，或有不濟。寺院及單丁住持，令本州覈實區處，併撥爲軍餉之助。餉足，則糴寬。糴寬，則米通，民永無貴糴患矣。朝論翕然，以爲論事有陽巖風。除大理寺簿。五年，轉朝散郎。知潮州。公之在潮也，視民事如家，視敵政如己疾。捐金以裕學廩，傾困以粟饑民。梁川以利病涉，知無不爲。爲無不盡。潮與漳汀接壤，鹽寇輦民郡聚，剽劫累政。以州兵單弱，山徑多蹊，不能討。公應變設奇，降者相屬。又欲於接境置屯，多者三百人，少者二百人，犄角爲援。郡爲創擗節庫以贍之。具有條畫，悉以言于朝。并下之漳汀。放此，且嚴保伍之令，以澄其源。大抵公智慮深達，如宿將持重，而規畫綿絡，不以鄰爲壑也。又潮有護田舊堤，多囓於水。地俸與民築石爲堤。民號之曰洪公堤。且刻賦頌其旁。曰：此我公東巖生佛所爲也。去之日，垂髻戴白者，擁車下不忍去。公雅意林壑，至是則曰：吾可優游樂吾真矣。九年，得旨主管華州雲臺觀。公時益暢於詩，數與嫺族觴詠從容，而學徒有志於考德問業。

者多授以外聲利。及終身受用之要。暇日登臨徜徉。愛南安之間。風氣明秀。取所謂小陂山者。曰。樂哉斯丘。我死則葬焉。預飭美槨。治壽藏。澹然塵外。蟬蛻之意。十年正月。公始屬微疾。卽乞以本官生前致仕。八日。忽索水自浴。衣冠休于正寢。翛然而逝。嗚呼。若公者。可謂啓手足而不亂。其風流篤厚。真足以追配文毅公於九原而無忤者矣。某於公之門。實丙辰省屋諸生。戊辰之春。待罪中朝。諗日拜公床下矣。未及而去國。然於公之踐脩出處之槩。蓋心識之。共惟穆陵豐芑。菁莪之澤。涵育天下。天下士翬然勃興。溫陵邈在海隅。人物相望。陽巖之氣節。煥發乎其前。東巖之抱負。翼承乎其後。使二公誠得盡展拓。又未知孰後孰前也。嗚呼。今復見斯人哉。曾祖遇。妣陳。祖德明。妣李。父伯道。贈宣教郎。妣陳。贈安人。元妃陳。先二十六年卒。贈安人。繼趙。封安人。先三年卒。子男應午。應申。應壽。俱業進士。女四。適胡登龍。丘公賜王毓奇。一尙幼。應午力學克肖。收拾公遺稿若干卷。曰。東巖集。藏于家。將以是年十月己未。奉治命以葬。趙安人附殯。應午千里貽書。俾某狀行。姑序其本末。以俟立言之君子。謹狀。

墓誌銘

知韶州劉容齋墓誌銘

咸淳四年四月十二日。容齋先生劉公元剛卒于家。年八十有二。先生官至郡守。死之日。幾無以爲斂。附於身者。稱家之有無。鄉黨之士。莫不高先生之風而哀其志焉。其邑子文天祥與人言。欷歔慷慨。重懼前

輩言行久遠沈湮。無以訓來者。會其子昌孫。以先生狀來請銘。某雖不敏。其可以辭。先生字南夫。一字南強。世爲吉州吉水縣人。治毛氏詩。早爲鄉校知名士。嘉定十年入太學。後六年登進士第。授迪功郎。信州永豐縣主簿。陞從政郎。調靜江軍節度推官。丁外艱。服除。差江州教授。兼濂溪書院山長。自故丞相董公槐。今丞相江公萬里以下。舉親民五員。淳祐五年班見。以通直郎知撫州崇仁縣縣政。以理民。以佛子爲謠。先生奉母夫人在官間。日與其弟自提板輿。相羊爲娛。邑人化之。以憂去。十年通判鄂州。以磨勘轉奉議郎。承議郎。董丞相當國。入爲左藏東庫。時將薦先生試館職。會董丞相去。不果。初東庫日進會于紙若干。丁丞相以趣辦爲才。風有司。頓增十萬。先生以職力爭。忤其意。展磨勘。兩年出爲泰州添差通判。景定元年某月。差知昭州。皇上登極。轉朝奉郎。適郡當次。稱疾不果行。旨差主管建昌軍仙都觀。居二年。再任。自江上平。凡權奸用事。所擯斥。朝廷獎拔殆盡。時論以先生爲屈。未幾。詔還磨勘。月日駸駸向用。而先生前一月逝矣。嗚呼。豈非命邪。早刻意詞科。書無不讀。其餘佛老精言。亦各深到。平生居官。所至清謹。家無餘貲。蕭然環堵。四方學者。執經問字。相繼于門。先生誘掖懇懇。不啻父兄之遇子弟。尤工爲文章。雖遊戲之筆。鮮不奇古。江湖之士。得品題一語。足自表於其徒。與人盡恭應接。終日無倦意。客至雅言之外。談玄演空。聞者往往忘去。世人以聲利爲門戶。先生惡之如惡惡臭。登第垂五十年。郡縣官吏知敬先生。不見其可畏。出入不設車徒。間步行井陌中。不以爲苦。甘心屢空。以至死而不悔。噫。此真所謂善人長者矣。曾

祖致道。妣周氏。祖圭。妣李氏。考次朔。累贈至奉直大夫。妣陳氏。熊氏。俱贈恭人。妃涂氏。先十六年卒。贈安人。子男三人。昌孫其長也。次信孫。愚孫皆蚤世。女長天。次適太學生陳應發。又次適進士胡淵。孫男一人。洵。武女一人。許適龍氏。以某月某日。葬某縣某鄉某里之原。遺墨有詩書孝經論語孟子演義若干卷。詞科類稿若干卷。客齋雜著若干卷。家庭謾錄若干卷。任左藏日。以孝經論語孟子演義上進。有旨降付資善堂。銘曰。文彪彪。德恂恂。貴如單門。死如齊民。約而家豐。而身我作銘詩。永懷古人。

義陽逸叟曾公墓誌銘

公諱珏。字天錫。號義陽逸叟。天祥外王父也。天祥不肖。賴公教誨。由記事以來。周旋三十年。於公無所不知。蓋至於其處死生之變。然後知他日觀公者未盡。而公誠有大過人者焉。嗚呼異哉。公性穎悟。志不樂凡近。讀書百家。雖涉獵靡不通達。所自得往往於佛老氏。其見之服行。敬恭神天。一言動不輕。口不御肉。月常十四五。對人敷闡玄寂。四座輒悚然傾聽。最後遇異人與語。幾欲棄人間事。求長生之術。年踰六十。始聞正學。恍然自失。死生之說。鬼神之情狀。講肄幽眇。頓改吾意。既臥疾。服藥外無所問。戒左右勿以巫祝從事。間祈禳厭勝。揜公不知。公覺輒撫床怒呼。病日久。骨立如束。聲吐精爽不變。冀猶足支歲月。一日。召天祥至。公乃鈎稽卜筮。指諸掌曰。今日老夫當訣。故令爾來。時聞命震愕。止公勿易言。公曰。吾豈不省事哉。形神合則爲人。吾形憊久矣。今腰足如斷。心火益燥。神且游散。居常謂不識死。死則如是。又曰。始吾

崇信異說。今且死。目中無怪見。顧二子。令必不爲佛事。周身一切。雖絲縷亦公所處分。殯宮哭位。與凡喪葬祭。具有成說。天祥弟璧。任京府尹掾。公口授數十言。令爲書遺之。強起字紙尾。句讀筆畫。曾不顛錯。集諸孫各付謹飭語。令羅拜床下辭去。衆泣漸揚。公曰。死生如晝夜。不足多憾。麾止之。索酒飲之。三連三言曰。吾真去矣。聲脫口而逝。嗚呼。陰陽魂魄。升降飛揚。氣之適至。雖夢寐莫適爲主。公幽明隔呼吸。而從容若此。世能言死者不少。此非嘗試事。臆度料想。靡所依據。公去來一息。實天祥所親見。道之粲然。莫此深切。嗚呼異哉。嗚呼異哉。公事父母孝。待族嫗以厚。與人交。久要不忘。倜儻尙義。不事生產作業。惻隱貧困。能推食解衣。議論剛正。好面折人。不藏怒宿怨。有古君子之風焉。公有子有孫。早授家政。天祥旣奉偏慈。迎公就養。居數年甚適。間出徐步。幅巾野服。人羨其優游。公亦論文賦詩。圍棋命酒。自謂天壤間陶陶人也。得疾於景定辛酉二月九日。始復正寢。歿之日。壬戌二月癸丑。得年七十有二。曾氏世家盱江。徙吉之泰和梅溪。族號長者。曾祖邦寧。祖知和。考昌權。妃張氏。先公十九年卒。子二。棐。棐女四。適錢光延。康師顏。于天秩。其仲。天祥母也。孫男六。端孺。淳孺。文孺。俊孺。良孺。明孺。女一。適郭泳。曾孫甫申。以次年九月丙午。葬吉水縣永昌鄉藥陂之原。成公志也。初公先世重卜葬。葬師壽張爲幻。封鬣無定居。公憮然曰。吾詎忍吾先至此。吾不可自求之乎。乃從兄瑾。載資越竟。旁參博扣。逾十年。得其說以歸。由是高曾而下一奠不再徙。公對葬師言。嘗斷斷不可不售。不傳。故祕莫得聞焉。公命未革。命天祥曰。老夫一日不起。無潛德傳。